

Ikuallannaveersaartitsineq qatserinerlu pillugit Inatsisartut peqqussutaata allanngortinnera pillugu Inatsisartut peqqussutaat (Naalakkersuisunut piginnaatitsissutip annertusineqarnera, pineqaatissiissutaasinnaasut annertusineqarnerat, uppersaatsissanik ujaasisarnermut maleruagassat aamma akitsuutinik akiliisitsisarneq)

§ 1

Ikuallannaveersaartitsineq qatserinerlu pillugit Inatsisartut peqqussutaat nr. 6, 30. oktober 1992-imeersoq imatut allannguuteqartinneqassaaq:

1. Kapitali 6-ip qulequtaa imatut oqaasertaliorneqassaaq:

"Qaartoornissamik ikuallattoornissamillu pinaveersaartitsineq, akuersissut, uppersaatsissanik ujaasineq akitsuutillu"

2. § 25 imatut oqaasertaliorneqassaaq:

"§ 25. Naalakkersuisut akoorutissanik qaartuujasunik eqqussinissamut, annissinissamut, toqqortaqaarnissamut, tuniniaanissamut, pisinissamut, tunniussinissamut, assartuinissamut, atuinissamut sananissamullu, kiisalu suliffeqarfinnik akoorutissanik qaartuujasunik toqqortaqaarfiusunik, atuiiffiusunik sanaffiusartunillu aaqqissuussinissamik maleruagassiorsinnaapput.

Imm. 2. Naalakkersuisut ikuallannaveersaartitsineq aammalu ikuallattoqalersillugu qatserinermi annaassiniarnermilu periarfissanik illersorneqarsinnaasunik qulakkeerinnissaq pillugu maleruagassiorsinnaapput.

Imm. 3. Naalakkersuisut innermik qaammaqqutinillu kiisalu ikumatitsivinnik aamma qaammaqqusersuinnermut, nukissiornermut kiassarnermullu atortunik allanik atuinissaq pillugu maleruagassiorsinnaapput.

Imm. 4. Naalakkersuisut akoorutissat suikkaasut, imerpalasut silaannartulluunniit pissusillit ikuallajasut pillugit maleruagassiorsinnaapput.

3. § 25-p kingorna kapitel 6-imut ikkunneqassaaq:

"§ 25 a. Naalakkersuisut inummut imaluunniit inatsisitigut pisinnaatitaasumut pisussaataitaasumullu ataatsimut amerlanerusunulluunniit akoorutissanik qaartuujasunik ikuallajasunilluunniit eqqussinissamut, annissinissamut, toqqortaqaarnissamut, tuniniaanissamut, tunniussinissamut, assartuinissamut, atuinissamut sananissamulluunniit kisermaassinissamik akuersissuteqarnikkut nalunaaruteqarsinnaapput.

Imm. 2. Naalakkersuisut kisermaassinissamik nalunaaruteqarnermut atatillugu atugassarititaasussanik aalajangersaasinnaapput, tak. imm. 1.

§ 25 b. Naalakkersuisut maleruagassanik Inatsisartut peqqussutaat naapertorlugu aalajangersarneqartunik unioqqutitsisuusorineqartumut pisariaqartumik uppersaasiinikkut aammalu siumoortumik eqqartuussisumit aalajangiiffunngitsumik misissuiartorlutik isersinnaatitaapput, tamanna pisariaqartutut naliliiffigineqarpat. Piginnittup taassumalu sulisuisa Naalakkersuisut misissuineranni pisariaqartitaannik ilitersuutissavaat ikiussallugillu. Misissuinerli imm. 1-imi taaneqartoq inini nammineerluni angerlarsimaffittut imaluunniit sunngiffimmi angerlarsimaffittut atorineqartuni ingerlanneqarsinnaanngilaq.

§ 25 c. Naalakkersuisut akoorutissanik qaartuujasunik pisinissamut atuinnissamullu akuersissusiornerminnut akuersissummillu nutarterinerminnut, qaartiterisartut pisortaattut akuersissusiornerminnut akuersissummillu nutarterinerminnut kiisalu qaartartuusivinnik akuersissusiornerminnut atatillugu akiliuteqartitsisassapput. Akiliutissaq Inatsisartut aningaasanut inatsisaanni oqaasertaliinikkut aalajangersarneqartassaaq.

§ 25 d. Maleruagassani § 25 naapertorlugu aalajangersarneqartuni Naalakkersuisut akuersissutitut akuerisaattulluunniit nalunaarutigisaasa utertinneqarsinnaanera aalajangerneqarsinnaavoq."

4. § 26, imm. 2 aamma 3 imatut oqaasertaliorneqassapput:

"*Imm. 2.* Maleruagassanik Inatsisartut peqqussutaat naapertorlugu aalajangersarneqarsimasunik unioqqutitsineq Kalaallit Nunaanni pinerluttulerinermik inatsit naapertorlugu pineqaatissiinermik kinguneqarsinnaavoq.

Imm. 3. Unioqqutitsineq, tak. imm. 1 aamma 2, inatsisitigut pisinnaatitaasumit pisussaataasumillu, Namminersornerullutik Oqartussanit, kommunimit imaluunniit kommunit suleqatigiiffiannit piliarineqarpat, akiliisussanngortitsineq inatsisitigut pisinnaatitaasumut pisussaataasumullu, Namminersornerullutik Oqartussanut, kommunimut imaluunniit kommunit suleqatigiiffiannut tutsinneqarsinnaavoq."

5. § 26, Imm. 4, atorunnaarpoq.

§ 2

Inatsisartut peqqussutaat 1. januar 2007 aallarnerfigalugu atuutilerpoq.

Namminersornerullutik Oqartussat, den 20. november 2006

Hans Enoksen

/

Jørgen Wæver Johansen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut